



ATASSUT

UPA 2015/139

Siverth K. Heilmann

27. 05. 2015

Inuusuttut suliffissaaleqinerat qanoq iliuseqarfigineqarnera qanorlu akiorniarneqarnera pillugu apeqquteqaat aallaavigalugu oqallisissiaq.

(Inuit Ataqatigiit Inatsisartunut ilaasortaatitaat)

ATASSUT-miit Inuit Ataqatigiit Inatsisartunut ilaasortaatitaat apeqquteqaat aallaavigalugu oqallisissiaqarnerannut qutsavigaagut.

Ukiorpaaluit matuma siornagut ATASSUT-miit oqariartaasiukkalarparput, nuannersumik ajornartorsiuteqarluta. Pisuussutit uumassusillit atorluarneqarpata, Maniitsup eqqaani aatsitsiviliornissaq, aatsitassarsiorneq uuliarsiornissarlu kingunerisaannik, nunatsinni sulisinnaasut amigaatigineqalissagaluarmata, avataaniillu sulisussanik tikisitsinissaq saneqqunneqarsinnaanani. Nunatta aningaasanik nutaanik pisariaqartitsinera, suliffiillu ataavartut pilersinneqartuuppata, isumalluarsimanerput assut annertusisimavoq uniinnassanngilagulli.

Taamak aallarniivugut, naak suliffiit aallartinngitsoornerinut, patsisaasut assigiinngitsut ilisimaneqalereeraluartut. ATASSUT-miit isumaqarpugut, pingaartumik inuusuttut siunissami suliffissarpasuit pilersinneqarsinnaanerinut eqqaasinneqartuartariaqartut suliffigilerumaagaannullu piukkunnarsarnissaq naleqqussarnissamullu politikkeriusugut aqutissiuussuuartariaqartugut.

Politikkerit suliffinnik kisimik pilersitsisinnaanngitsut nalunngilarput. Illoqarfinni nunaqarfinnilu, pisortat, namminersortut, inuillu suliffinnik nutaanik suliffiillu pioreersunut inerisaarusuttut qinikkatut suleqatigilluaraanni anguneq ajornanngilaq. Kommuune-ni Namminersorlutik Oqartussat sulisitsisullu akunnerminni pilersaarusiorluaraanni, inuusuttut sanaartornerup nutarterinerullu iluani atorluarneqarnerunissaat pikkoriffigineqarnerusariaqartut ATASSUT-miit isumaqarpugut.

Ilu Moorpoq inuusuttut suliffissaaleqinerminni siunnersorneqarnissaat, ilinniarnermik sulinermillu aallartinnissaannut pisortat ikorfartuisinnaanerit ilaatigut killeqarsinnaasarmat. ATASSUT-miit misilittagaqarfigilluarparput, suliffeqarfiit nunami pioreersut, aalisariutaatillit inuttassaaleqisartut peqatigalugit, inuusuttut suliffissaaleqisullu allat aqutissiuuttarlugit. Suliffissaaleqisutut naqitsikkiartuinnartartut ikilisiinnarnagit, aningaasarsiulernissaannut ikiuuttaarneq iliuisaavoq kusanartoq atornerarnerusariaqartorlu.

ATASSUT-ip politikkeraa, ilinniarneq, ilinniarneq aammalu ilinniarneq. Nuannaarutissaavoq qaffasissumik ilinniagaqarneq aqutigalugu angusarissaartoqartarmat amerliartuinnarnissaallu suli suliassat pingaarnersaraat. Silarsuarmioqataajartuinnarpugut, inuusuttut nunatta avataanut qaffassarniarlutik ilinniarusuttut, pisortaniit taperneqartarnerat assut ajorseriarnikuuvoq.

Angajoqqaarpasut nersugassaapput aningaasarpasut atorlugit meeqqamik ilinniagaqarnissaannut tapersersuisarmata, uvagulli politikkerit anguniartariaqalerparput tapeeriaatsit nalilersoqqissallugit. Nunarput namminiilivinniarluni angernikuusoq, inuusuttut tamaasa nunatsinni atorfissaqartillugit ilinniarluarsimasuunissannillu piumasaqarfigisarpagut, peqatigiilluta nalilersueqqitta ATASSUT peqataassaaq.

Meeqqalli aamma atuarfiini atuarnermi piginnaasamikkut, inuusuttutullu ikaarsaarnerminni katataasut, Piareersarfiit aqutigalugit puujuinnarnagit qaffassarusuttut periarfissaqartariaqartut isumaqarpugut. Atuagarsornermik ajornartorsiutilippassuaqarpoq aammali assasornermik sulinernullu pikkorilluinaqqissaartunik piginnaaneqartunik. Piareersarfiit saniatigut aamma Piorsaaviit, inuusuttut sulinermut ilinniarnermut ikorfartorluinnarneqartariaqartunik peqarpoq, naammassisaqarluartarnermikkut innuttaasuniik nuannaarutaasartunik takussutissiisartut politikikkut tapersersugassaapput.

Oqallisissiamut annertunerujussuarmik oqaaseqarsinnaagaluarluta qujaatigaluta, ATASSUT-miit naggasiukkusupparput, pisortat, qinikkanilu siuttuusut suliffeqarfinnut attaveqarluarunik, suliffissaaleqisullu naqitsisarnerat naammagiinnarnagu, oqaloqatigiinnissamut siunnersorneqarnissamut periarfissinneqaraangamik tamatigunngikkaluaq pitsaasumut alloriartoqartarpoq atorluaannagassamik.

